

■ PRO SVIZRA RUMANTSCHA

Pro Svizra Rumantscha cun nov co-presidi

(cp) Il venderdi passà ha la Pro Svizra Rumantscha (PSR) già sia 26avla radunanza generala suenter in onn cun blers projects ed engaschi. A la sesida en la Hofkellerei a Cuira ha la supranza dà pled e fatg da la lavur da la PSR e preschentà ils accents dal proxim onn. Avant in onn ha la PSR preschentà a sia radunanza generala ina visìun da la Rumantschia per il 2020 nua ch'ella ha formulà trais chavazzins che duain esser en il center da la lavur da la PSR. Quai è per l'ina il chavazzin «representaziun» nua che la PSR è s'engaschada per l'installaziun d'ina cumissiun da linguas sin nivel federal. Il cussegl dals chantuns ha approvà la moziun inoltrada da *Stefan Engler*, il cussegl naziunal l'ha deplorablmain refusà. Sut il chavazzin «deliberaziun» ha la PSR cumenzà a concretisar in inscunter che duai avair lieu l'onn 2018 e sa drizza a persunas giuovnas.

Infurmaziun

Il terz chavazzin, «infurmaziun», ha survegnerà l'anim l'onn passà. Tge che ha cumenzà sco project da recaltgar abunents per La Quotidiana è s'avanzà a la debatta davart il futur da las medias ru-

mantschas causa ils problems da La Quotidiana e la campagna enturn la No-Bil-lag ch'avess disfatg RTR. La PSR ha contribuì per l'ina cun organisar maisas radundas da medias nua ch'ella ha già la pussaivladad da surpender ina rolla da moderaziun tranter las differentas partidas, per l'autra cun ina campagna da social media cun las figuras fictivas «Flurin ed Ursina» encunter l'iniziativa da No-Bil-lag en ils emprims mais dal 2018.

Medias rumantschas e confirmaziun da la supranza

Per l'onn proxim èn ils dus accents vinavant sin il futur da las medias rumantschas e l'organisaziun da l'inscunter 2018 planisà per l'atun. Per che las finiras possian vegnir cuntanschidas ha la PSR confermà la supranza existenta. Vinavant en la supranza èn uschia (alfabeticamain) *Jon Bischof*, *Flurin Bundi*, *Martin Cantieni*, *Clau Dermont*, *Barbla Etter* ed *Annetta Zini*. Ina roschada è vegnida fatga tar il co-presidi. Annetta Zini e Flurin Bundi èn sa retratgs dal co-presidi e restan engaschads en la supranza. Da nov èn Barbla Etter e Clau Dermont vegnids elegids en il co-presidi da la Pro Svizra Rumantscha.